

## La iniziative

# Il Friûl al alce il cjâf

**L**is rapresentancis des istituzions publichis de Region Autonome, des Provinciis, dai Comuns e des associazions culturâls e sociâls di dut il Friûl a saran clamadis a sostignî la esigence che il Consei regionâl tes prossimis setemanis al fasi buinis finalmentri, dopo agnis di spiete, lis leçs di tutele des lenghis furlane, slovene e gjermaniche e parcè che si aplichin in manere rigorose lis indicazions dai esperts incjariâts de stesse Zonte regionâl pe jentrade a plen titul de lenghe furlane a scuele, in atuazion de leç statâl 482 e de convenzion de Union Europeane.

Lassise des rapresentancis furlanis e je convocade par martars ai 11 di Setembar dal 2007 aes 17.30 li de Aula Magna de Universitât in plaçâl Kolbe a Udin.

Cheste iniziative e je promovude de Universitât dal Friûl, dal comitat pe autonomie e pal rilanz dal Friûl, dal comitat 482, de Vite Catolice, di Radio Spazio 103 e Radio Onde Furlane.

Su chest impuartant apontament o vin sintût Arnalt Baracêt, za parlamentâr e component carismatic dal comitat pe autonomie e pal rilanz dal Friûl, che al comentè "Dutis chestis polemichis estevis sul furlan a scuele, di chei che a disin "al è miôr l'inglês", "no si à di imponi", "si à di viodi des feveladis locâls" a palesin dome une grande ostilitât pal ricognosiment de identitât furlane: a son preocupâts parcè che il Friûl al è daûr a diventâ simpri plui fuart e a lôr ur larès miôr che i furlans a restassin sotans". Arnalt Baracêt al continue "Noaltris invezit o volin dome che il popul furlan al vedi ricognossût ce che i spiete: la tutele nestre identitât, de nestre muse. Noaltris no fasìn chest parcè che o sin nostalgjics de Ete di Mieç ni parcè che o sin sierâts tal nestri ort: o sîh convints che dome cuntune valorizazion fuarte dal nestri patrimoni identitari o podarìn vinci la sfide cuintri de omologazion e de globalizazion. Un principi che al val in particolar pai generazions zovinis che a corin il pericol di viodisi splanâts intune marmelade cence gust". A cui che ju acuse di fâ un discors politic Arnalt Baracêt al rispuint "Sigûr, ma tal sens plui larc dal tiermìn, tal sens di difindi l'interès dal popul furlan e no un interès partituc: mi plâs ricuardâ pre Antoni Beline che al diseve che si veve di cjâlâ pal interès dal Friûl e noaltris o fasarìn cussì e ai 11 di Setembar lu disarìn a clâr inmò une volte. O cjararìn chei che sedi a çampe sedi a drete a çaparan a cûr la cuestion furlane!"



E chesta bataie e je daûr a puartâ i prins impuartants risultâts (la leç di tutele linguistiche, la assemblee des provinciis furlanis e in curt ançe la cuestion de Rai par furlan) e par chest e spavente i opositôrs de cause furlane. "Cui che al bat cuintri di noaltris al à simpri un ategjament negatîf, lu dis la peraule stesse: a son cuintri" al dis Arnalt Baracêt "Noaltris no vin voie di fâ nissune azion ni cuintri di Triest ni cuintri di nissun: martars ai 11 o tomarìn a marcâ cun fuarce il nestri pont di viste e di azion che al è a pro dal autoguver dal popul furlan!" E i organizadôrs de iniziativa a ricuardin ançe e soreudut che la presince in Friûl di diviersis comunitâts linguistichis ançe extracomunitariis e je a la fonde de concession e de esigence di mantignî in Friûl - Vigneste Julie i podês e il regim juridic costituzionâl di Region autonome a Statût speciâl, cussì come che al è in Trentin Sud Tiròl e in Val di Aoste.

**Christian Romanini**